



- SENAT -

Broj: 01-12-1/26

Sarajevo, 27. 04. 2026. godine

**Z A P I S N I K**  
**SA 6. VANREDNE SJEDNICE SENATA**  
**UNIVERZITETA U SARAJEVU ODRŽANE 27. 04. 2026. GODINE**

**Prisutni/e članovi/ce Senata:** prof. dr. Tarik Zaimović, rektor, prof. dr. Dženana Husremović, prof. mr. Arma Tanović Branković, prof. dr. Kemal Durić, prof. dr. Naris Pojskić, naučni savjetnik, prorektori/ce, Jusuf Bukva, student-prorektor, prof. mr. Dubravka Pozderac-Lejlić, prof. Lejla Jusić, prof. dr. Erdin Salihović, prof. dr. Lejla Demirović (po ovlaštenju), prof. dr. Kenan Musić (po ovlaštenju), prof. dr. Jasmin Ahić, prof. dr. Sead Turčalo, prof. dr. Husnija Kajmović (po ovlaštenju), prof. dr. Arzija Pašalić, prof. dr. Mirza Dedić, prof. dr. Adnan Busuladžić, prof. dr. Samir Dolarević, prof. dr. Mario Bernadić, prof. dr. Nedim Pervan (po ovlaštenju), prof. dr. Almir Fajkić (po ovlaštenju), prof. mr. Ališer Sijarić, prof. dr. Mirela Omerović, prof. dr. Vedad Falan (po ovlaštenju), prof. dr. Nusret Drešković, prof. dr. Nina Marković, prof. dr. Besim Balić, prof. dr. Sabina Šerić-Haračić (po ovlaštenju), prof. dr. Adaleta Durmić Pašić, naučna savjetnica, dr. sci. Aladin Husić, dr. sci. Hikmet Karčić (po ovlaštenju), dr. sci. Jasmin Hodžić, prof. dr. Lajla Hasić Branković, prof. dr. Emir Tahirović, te predstavnici/e Udruženja *Studentski parlament Univerziteta u Sarajevu*: Ali Jusović predsjednik, Muedib Šahinović, Davud Isaković, Ilhana Felić, Ajdin Avdović i Elmir Merdžanić.

**Odsutni/e:** prorektor/ica za kvalitet, prof. dr. Benina Veleđar, prof. dr. Jasmin Velagić, prof. dr. Amel Kosovac, prof. dr. Zinka Grbo, dr. sci. Sedad Bešlija, te predstavnica Udruženja *Studentski parlament Univerziteta u Sarajevu* Emilija Novaković.

**Sjednici prisustvuju:** gđin. Kenan Filipović, dipl. iur, generalni sekretar Univerziteta u Sarajevu, gđin. Adnan Muratović, stručni saradnik i gđin. Rijad Crvenjak, stručni saradnik u Službi za pravne poslove.

Sjednica je počela u 15:00 sati.

Sjednicom je predsjedavao prof. dr. Tarik Zaimović, rektor Univerziteta u Sarajevu.

Prof. dr. Tarik Zaimović je konstatirao da postoji kvorum za rad, odnosno da sjednici prisustvuje 40 članova/ica Senata sa pravom glasa, od toga osam (8) članova/ica sa ovlaštenjem koje se nalazi u dokumentaciji Senata.

U nastavku članovi/ce Senata su jednoglasno usvojili slijedeći

### **D N E V N I   R E D:**

1. Razmatranje aktivnosti Univerziteta u Sarajevu povodom Prijedloga Regulacionog plana „Kvadrant C – Marijin Dvor”.

### **T O K   S J E D N I C E**

#### **Ad-1.**

Rektor Univerziteta u Sarajevu, prof. dr. Tarik Zaimović, informisao je članove i članice Senata o statusu predmeta *Prijedlog Regulacionog plana „Kvadrant C – Marijin Dvor”*, imajući u vidu da je Senat na 5. vanrednoj sjednici usvojio Zaključak kojim se između ostalog, cijeneći postojeće okolnosti, zakazuje vanredna sjednica Senata dana 27. aprila 2026. godine.

U nastavku izlaganja, rektor prof. dr. Tarik Zaimović informisao je članove i članice Senata da su, postupajući po ranije usvojenim zaključcima, održani razgovori sa predstavnicima Gradske uprave, Zavoda za planiranje razvoja Kantona Sarajevo i Univerziteta u Sarajevu, pri čemu je iskazana spremnost da se Prijedlog regulacionog plana povuče radi dodatnog usaglašavanja stavova. Istaknuto je da se zahtjevi Univerziteta odnose na izmještanje, odnosno brisanje planiranog parkinga i pomjeranje saobraćajnice, uz ocjenu njihove opravdanosti. Kako je naveo, do povlačenja prijedloga nije došlo, te su Univerzitetu upućeni daljnji pozivi za postupanje, a stručno mišljenje bit će prezentirano od strane nadležnog izvjestioca. S tim u vezi, u skladu sa zaključkom Senata, zakazana je sjednica radi donošenja odgovarajuće odluke, uz razmatranje daljnjih aktivnosti, uključujući informisanje javnosti. Ukazao je na različita tumačenja u javnom prostoru i zaprimljena obraćanja o mogućim implikacijama na projekte Univerziteta, uključujući saradnju sa CERN-om, te najavio sastanak sa nadležnim institucijama uz učešće stručnjaka Univerziteta, naglašavajući opredijeljenost Univerziteta za dijalog i zaštitu svojih interesa.

Rektor je predložio da se u 12:00 sati 28. 04. 2026. godine, održi press konferencija na kojoj će prisustvovati rektor, prorektori/ice, dekani/ice i predstavnici studenata/ica, dok će se protesti održati u 09:30 sati 29. 04. 2026. godine, na Trgu ispred zgrade Vijećnice (Trg Prve brigade Policije Stari Grad). Također, predložio je da shodno tome Senat donese Odluku da se nastavnici, saradnici, nastavno osoblje i studenti oslobađaju izvršavanja akademskih i drugih obaveza (nastavnih i ispitnih) dana 29. 04. 2026. godine od 08:00 sati do 12:00 sati, što koincidira sa periodom predloženog održavanja mirnog okupljanja.

Zatim je otvorena diskusija u kojoj su učestvovali: prof. dr. Tarik Zaimović, prof. dr. Dženana Husremović, prof. dr. Nusret Drešković, prof. dr. Samir Dolarević, gđin. Kenan Filipović, dipl. iur, generalni sekretar, Ali Jusović, prof. dr. Nedim Pervan, prof. dr. Arzija Pašalić, prof. dr. Nina Marković, prof. dr. Kenan Musić, prof. dr. Sead Turčalo i prof. dr. Jasmin Ahić.

Prof. dr. Dženana Husremović istakla je podršku predloženim aktivnostima, naglašavajući potrebu prisustva akademskog osoblja u cilju zaštite interesa Univerziteta u Sarajevu. Ukazala je na značaj predmetnog pitanja, posebno u kontekstu realizacije važnih naučnoistraživačkih projekata, uključujući

saradnju PMF-a sa CERN, te izrazila stav da je neophodno jasno ukazati na moguće posljedice donošenja predloženih rješenja.

Prof. dr. Nusret Drešković iznio je ključne prijedloge i aktivnosti, navodeći da je krizni štab Univerziteta u Sarajevu – Prirodno-matematičkog fakulteta ukazao na potrebu održavanja press konferencije radi informisanja javnosti i jasnog isticanja interesa Univerziteta, uz ocjenu da su prijedlozi Univerziteta u dosadašnjem postupku neargumentirano odbijeni. Istakao je podršku stručnom mišljenju nadležnih članica Univerziteta, kao i potrebu obraćanja Gradskom vijeću Sarajeva i njegovim vijećnicima, te upućivanja poziva na proteste zaposlenicima i studentima za iskazivanje podrške i zaštitu interesa Univerziteta. Također je naveo da se planira organizacija okupljanja uz odgovarajuću logistiku i infrastrukturu, uz uključivanje studenata putem Studentskog parlamenta Univerziteta u Sarajevu, s ciljem postizanja što šireg odziva.

Prof. dr. Samir Dolarević, u svojstvu izvjestioca ispred stručnog tima, koji čine članovi akademskog osoblja, iznio pojedinosti rada, te kako je sa tehničkog aspekta utvrđeno kako predloženo rješenje može dovesti do povećanja saobraćajnog opterećenja i brzine kretanja vozila, pojave tranzitnog saobraćaja te smanjenja nivoa sigurnosti, posebno za studente i zaposlenike, uz potencijalne konflikte između pješačkog i kolskog saobraćaja. Ukazao je i na probleme u vezi sa pristupom i izlaskom sa parking mjesta, manevrisanjem, pojavom uskih grla i zagušenja, što može rezultirati narušavanjem funkcionalnosti i padom nivoa usluge ispod optimalnog. Dalje je naveo da su identifikovani i dodatni tehnički nedostaci, uključujući neusklađenosti u grafičkim prikazima, ograničenja u saobraćajnim tokovima, prisustvo komunalne infrastrukture i potencijalno opasnih instalacija, kao i planirana rješenja koja mogu generirati dodatno opterećenje saobraćaja. Istakao je da je stručni tim spreman aktivno učestvovati u pronalaženju adekvatnog i održivog rješenja, a dva alternativna rješenja za predmetni regulacioni plan su već spremna.

Gdin. Kenan Filipović, dipl. iur, generalni sekretar, istakao je da se predmetne aktivnosti posmatraju kao zaštita imovinskih i institucionalnih interesa Univerziteta, ali i kao pitanje principa i odgovornosti. Naglasio je značaj organizovanog i vidljivog prisustva, uz ocjenu da je riječ o početnoj fazi šireg procesa u kojem je potrebno istrajati, te ukazao na potrebu odlučnog djelovanja u cilju zaštite imovine i pozicije Univerziteta.

Ali Jusović, predstavnik Studentskog parlamenta Univerziteta u Sarajevu naveo je da će studenti održati sjednicu u cilju usaglašavanja daljnjeg djelovanja i pružanja podrške Univerzitetu u Sarajevu i članicama, ističući da će nastupati jedinstveno i koordinirano, te da pružaju punu podršku i da će istrajati u zaštiti imovine Univerziteta i sigurnosti nastavnika/ica i studenata/ica.

Prof. dr. Nedim Pervan naveo je da je Univerzitet u Sarajevu – Mašinski fakultet uključen u aktivnosti te da pruža punu podršku predloženim mjerama, uključujući organizaciju press konferencije, uz napomenu da fokus treba biti na press konferenciji i medijskom pritisku.

Prof. dr. Arzija Pašalić istakla je da predmetne aktivnosti ne treba posmatrati kao pitanje izbora, već kao obavezu i interes Univerziteta u Sarajevu, naglašavajući potrebu zajedničkog i koordiniranog nastupa svih članova. Ukazala je na značaj jedinstva bez obzira na pojedinačne razlike, ocjenjujući trenutnu situaciju kao svojevrsni test institucionalne snage i spremnosti na zajedničko djelovanje u zaštiti interesa Univerziteta.

Prof. dr. Nina Marković istakla je da mora biti jasno postavljeno šta su planirani ishodi protesta i šta je poruka protesta koju šaljemo, s tim da u potpunosti podržava održavanje istih.

Prof. dr. Kenan Musić naveo je da je važno osigurati vidljivo prisustvo zaposlenika i studenata u skladu s realnim mogućnostima, ističući da takav odziv reflektuje institucionalni autoritet i odgovornost. Naglasio je da je zaštita imovine Univerziteta obaveza svih zaposlenika, te da svaki pojedinac treba na taj način posmatrati svoju ulogu, što je sigurno opredjeljenje Univerziteta u Sarajevu – Fakulteta islamskih nauka koji će ovom i budućim pozivima odgovoriti na snažan način.

Prof. dr. Sead Turčalo istakao je značaj medijskog pristupa i organizacije press aktivnosti, ukazujući da je predmetna tematika složena za širu javnost. Izrazio je da u pogledu organizacije protesta, potrebu opreznog pristupa radi efikasnog postizanja ciljeva od značaja za Univerzitet u Sarajevu.

Prof. dr. Jasmin Ahić istakao je da će predmetno pitanje imati aktuelan karakter duže vrijeme te u potpunosti podržao organizaciju protesta, uz poziv na uključivanje studenata i potrebu iskazivanja institucionalne snage i jedinstva.

Nakon provedene rasprave, Senat Univerziteta u Sarajevu *jednoglasno je donio sljedeći*

## **Z A K L J U Č A K**

1. Univerzitet u Sarajevu, u cilju zaštite imovine, funkcionalne cjeline i sigurnosti Univerziteta u Sarajevu, dana 29. 04. 2026. godine u 9:30 sati, na Trgu Prve brigade policije, općina Stari Grad, Sarajevo, ispred zgrade Vijećnice održati mirno okupljanje članova akademske zajednice, nenastavnog osoblja i studenata Univerziteta u Sarajevu radi javnog izražavanja stava povodom Prijedloga Regulacionog plana „Kvadrant C – Marijin Dvor“.
2. Univerzitet u Sarajevu će, cijeneći opredjeljenje svih članica u sastavu za zaštitu ugleda, integriteta i imovine Univerziteta u Sarajevu, u skladu s principima akademske autonomije, akademske samouprave i prava upravljanja i raspolaganja imovinom visokoškolskih ustanova, dana 28. 04. 2026. godine, sa početkom u 12:00 sati održati konferenciju za medije u Rektoratu Univerziteta u Sarajevu, Obala Kulina bana 7/II.

U vezi sa prethodno usvojenim Zaključkom, Senat Univerziteta u Sarajevu *jednoglasno je donio sljedeću*

## **O D L U K U**

### **I**

Nastavnici, saradnici, nenastavno osoblje i studenti Univerziteta u Sarajevu oslobađaju se izvršavanja akademskih i drugih obaveza dana 29. 04. 2026. godine u periodu od 8:00 do 12:00 sati, radi održavanja mirnog okupljanja organizovanog radi javnog izražavanja stava povodom Prijedloga Regulacionog plana „Kvadrant C – Marijin Dvor“.

## II

Odsustvo iz tačke I ove odluke neće se smatrati neopravdanim, niti će imati negativne posljedice po radno-pravni odnosno akademski status nastavnika, saradnika, nenastavnog osoblja i studenata.

## III

Članice Univerziteta u Sarajevu dužne su organizirati nadoknadu propuštenih nastavnih i ispitnih aktivnosti i osigurati kontinuitet nastavnog procesa do punog fonda sati.

## IV

Za provođenje ove odluke zadužuju se rukovodioci članica Univerziteta u Sarajevu.

## V

Ova odluka stupa na snagu danom donošenja.

Sjednica je završena u 16:00 sati.

***R E K T O R***

***Prof. dr. Tarik Zaimović, s.r.***

*Zapisničari:*

*Adnan Muratović, stručni saradnik, s.r.*

*Rijad Crvenjak, stručni saradnik, s.r.*